

Na osnovu člana 35. Statuta NS/FS BiH, Izvršni odbor NS/FS BiH na sjednici održanoj u Sarajevu, 23.05.2016 godine, d o n o s i

## **PROPOZICIJE**

### **za takmičenje Premijer omladinske lige BiH (juniora i kadeta), završnice Omladinskog Kupa BiH i završnice Pionirskog prvenstva BiH u takmičarskoj 2016/2017. godini**

#### **OPŠTE ODREDBE**

##### **Član 1.**

Učesnici takmičenja u Premijer omladinskoj ligi BiH (u daljem tekstu POL BiH) u takmičarskoj godini 2016/17, je 12 klubova, čiji seniori u istoj takmičarskoj godini učestvuju u takmičenju BH Telecom Premijer lige BiH.

##### **Član 2.**

Takmičenjem u Premijer omladinskoj ligi BiH rukovodi Komitet za takmičenje NS/FS BiH, u saradnji sa Sektorom za takmičenja i upravljanje događajima NS/FS BiH.

##### **Član 3.**

Takmičenje u Premijer omladinskoj ligi BiH provodi se po trostrukom bod – sistemu, a prema kalendaru takmičenja, koji donosi Izvršni Odbor NS/FS BIH.

Raspored utakmica prva dva kruga određen je žrijebom suprotno od žrijeba seniora BH Telecom Premijer lige BiH.

Raspored utakmica trećeg kruga određuje se na slijedeći način:

- Zbrajaju se rezultati kadetske i juniorske ekipe ostvareni u prva dva kruga takmičenja;
- Na osnovu zbira rezultata, formira se jedinstvena tabela;
- Ukoliko dva ili više klubova imaju isti broj bodova, onda se plasman određuje na osnovu gol-razlike, a ako je i to jednako, onda na osnovu čl. 46 Pravilnika o takmičenjima NS/FS BiH;
- Žrijeb se vrši pomoću „Bergerovih tablica“, a redni broj kluba je određen plasmanom na zajedničkoj tabeli.

U treći krug ekipe (kadeti i juniori) prenose sve rezultate (bodove i gol-razliku) ostvarene u prva dva kruga takmičenja.

##### **Član 4.**

Utakmice traju 2x45 minuta (juniori), a 2x40 minuta (kadeti).

Odmor između dva dijela igre traje minimalno 10, a maksimalno 15 minuta.

##### **Član 5.**

Nakon obavljenog žrijeba, klubovi su obavezni da u roku od 10 (deset) dana dostave:

- naziv stadiona na kojem će se igrati utakmice,
- naziv alternativnog (rezervnog) stadiona primljenog od nadležne Komisije,
- mjesto i vrijeme odigravanja utakmica (subota ili nedjelja zavisno kada igra seniorski tim),
- širi spisak igrača sa datumom rođenja, ime oca i broj legitimacije,
- boja dresova (osnovna i rezervna).

##### **Član 6.**

Tri posljednja prvenstvena kola igraju se istog dana i u isto vrijeme.

## **PROMJENA TERMINA ODIGRAVANJA UTAKMICA**

### **Član 7.**

Ukoliko klubovi iz objektivnih razloga traže promjenu termina odigravanja utakmica u odnosu na prijavljeni termin igranja, zahtjev treba dostaviti Komitetu za takmičenje najmanje 8 (osam) dana prije odigravanja utakmice. Za promjenu termina, ukoliko se utakmica odigrava u radni dan, neophodna je saglasnost protivničkog kluba.

U slučaju kada zahtjev za promjenu termina nije podnesen u skladu sa prethodnim stavom, Komitet za takmičenje NS/FS BiH može promijeniti termin utakmice samo ukoliko je klub koji traži promjenu termina dostavio i pismenu saglasnost drugog kluba, što je moguće prije, a najkasnije tri (3) dana prije utvrđenog termina utakmice.

Kada je došlo do promjene termina utakmice, Komitet za takmičenje NS/FS BiH će donijeti odluku da se ona odigra u prvom slobodnom terminu (ako su prestali razlozi zbog koje je utakmica odgođena), pod uvjetom da svaki klub ima najmanje dva slobodna dana između odigravanja dvije utakmice.

Komitet za takmičenje NS/FS BiH može u opravdanim slučajevima, ili u pismenom dogovoru klubova, odobriti izmjenu dana i satnice odigravanja pojedinih utakmica.

Klub domaćin koji zbog razloga više sile ne može odigrati utakmicu na svom terenu ili odobrenim i prijavljenim terenima, dužan je najkasnije 8 (osam) dana prije navedene utakmice, odrediti mjesto i stadion gdje će biti domaćin utakmice i u pismenoj formi obavijestiti Komitet za takmičenje NS/FS BiH. U izuzetnim slučajevima, o čemu odlučuje Komitet za takmičenje NS /FS BiH, rok prijave se može skratiti na 3 (tri) dana.

Klubovi u takmičenju POL BiH imaju pravo na odlaganje prvenstvene utakmice, ukoliko je iz njihove ekipe pozvano tri (3) ili više igrača za sastav reprezentacije BiH U-15, U - 17 , U - 19 i U – 21, s tim što se odgađa i utakmica kadeta ukoliko se iz naprijed navedenog osnovanog razloga odgađa utakmica juniora i obratno.

## **DUŽNOSTI KLUBOVA**

### **Član 8.**

Klub domaćin je obavezan za obje utakmice (kadeti i juniori) pripremiti svlačionice i teren za igru, a odluku o pogodnosti terena donosi isključivo sudija utakmice.

### **Član 9.**

Klubovi su dužni doći na stadion odigravanja utakmice 90 minuta prije početka.

### **Član 10.**

Klub domaćin obavezan je da delegatu utakmice stavi na raspolaganje računar sa internet konekcijom i štampač, te da pruži svu neophodnu pomoć u sastavljanju zapisnika.

### **Član 11.**

Klub domaćin je obavezan na svim utakmicama postaviti na jarbole: državnu zastavu Bosne i Hercegovine, zastavu NS/FS BiH, a mogu se postaviti klupske, entitetske zastave, zastave županija/kantona/područja, zastava fair playa. Istaknute zastave moraju biti istih dimenzija.

Postavljanje drugih zastava nije dozvoljeno, a u slučaju njihovog postavljanja, klub će snositi disciplinske sankcije po članu 52. Disciplinskog pravilnika NS/FS BiH.

## **Član 12.**

Klub domaćin je dužan da preduzme sve mjere u cilju obezbjeđenja ličnosti: članova gostujuće ekipe i službenih lica prije utakmice, za vrijeme odigravanja utakmice i po završetku utakmice, sve do napuštanja stadiona i mjesta odigravanja utakmice.

Domaći klub je, također, dužan da obezbijedi odgovarajuću dežurnu redarsku službu dovoljnim brojem redara, te prisustvo pripadnika policije, ljekara, vozila hitne pomoći (ili adekvatnog zamjenskog vozila) i 2-4 lica sa nosilima i dovoljan broj sakupljača lopti.

Klub-domaćin je obavezan nadležnoj policijskoj upravi prijaviti mjesto i vrijeme odigravanja utakmice, te druge relevantne podatke. na zahtjev policijske uprave.

Bez pripadnika policije, vozila za hitnu pomoć (koji se ne smiju nalaziti u ograđenom dijelu terena) i ljekara, utakmica se neće igrati.

## **Član 13.**

Za vrijeme odigravanja prvenstvenih utakmica u stadionu, pored terena za igru, u tehničkom prostoru mogu se nalaziti slijedeća lica na koja se primjenjuje dole navedeni standardi u pogledu odijevanja:

1. predstavnik kluba u odijelu (sa kravatom ili ne, uz istaknutu akreditaciju izdatu od NS/FS BiH)
2. glavni trener u odijelu (sa kravatom ili ne), ili treneri kluba
3. dva pomoćna trenera u treneri kluba
4. igrači u sportskoj opremi sa markerima
5. ljekar kluba, odijelo ili trenerka
6. fizioterapeut u treneri kluba

Predstavnik kluba, glavni trener ili pomoćni trener ne mogu biti ista osoba.

Navedena lica obavezna su posjedovati odgovarajuću licencu koju izdaje NS/FS BiH za tekuću takmičarsku sezonu.

Validnost izdatih potrebnih dokumenata mogu kontrolisati samo subjekti koji su ih i izdali, a delegat na utakmici utvrđuje njihovo posjedovanje, odnosno identitet predstavnika kluba.

Osobe čiji se identitet ne može utvrditi ne mogu se nalaziti u tehničkom prostoru, osim zamjenskih igrača za koje važe odredbe člana 18. Propozicija POL BIH.

## **KALENDAR TAKMIČENJA**

### **Član 14.**

Raspored odigravanja utakmica u polusezoni objavljuje Komitet za takmičenje NS/FS BiH putem web stranice i to najkasnije 15 dana prije početka takmičenja.

Raspored odigravanja utakmica za određeno kolo dostavlja se klubovima. Raspored sadrži mjesto igranja, takmičarski par i dan sa satnicom odigravanja utakmica, te obavezuje klubove da u skladu s tim odigraju utakmicu.

Utakmice POL BiH igraju se subotom i nedjeljom, ovisno od toga kada kao domaćin igra seniorski tim. Utakmice koje se igraju tokom sedmice igraju se srijedom, odnosno, četvrtkom.

## **ORGANIZACIJA UTAKMICA - OBAVEZE I ODGOVORNOSTI**

### **Član 15.**

Odredbe o organizaciji i redu na utakmicama donose organi koji rukovode takmičenjem u skladu sa odredbama Pravilnika o nogometnim/fudbalskim takmičenjima NS/FS BiH i Propozicijama takmičenja BH Telecom Premijer lige BiH.

Organizaciju utakmica vrše klubovi domaćini, koji su obavezni osigurati sve uvjete u skladu sa važećim propisima. Klub domaćin je obavezan poduzeti sve potrebne mjere za sigurnost sudaca, delegata i gostujućeg tima, prije, za vrijeme odigravanja utakmice pa sve do napuštanja igrališta-stadiona odgovarajućim prevoznim sredstvom.

Klub domaćin obavezan je izvršiti najavu utakmice kod nadležne policijske uprave i zatražiti policijsko osiguranje, te se blagovremeno pobrinuti da na utakmicama juniora i kadeta budu prisutni pripadnici policije.

Klub domaćin obavezan je osigurati redarsku službu, najmanje dva redara, sa povjerenikom za sigurnost.

Klub domaćin obavezan je osigurati skupljače lopti (najmanje šest) koji moraju biti propisno odjeveni.

Klub domaćin obavezan je na svim utakmicama osigurati liječničku službu i vozilo hitne medicinske pomoći, koje mora biti uz igralište i u slučaju potrebe obaviti prijevoz do zdravstvene ustanove. Ukoliko vozilo prve pomoći ne dođu na igralište do početka utakmice, ista neće započeti sve dok klub ne osigura prikladno i obilježeno osobno vozilo kojim će se, u slučaju potrebe, ozlijeđeni prevesti do najbliže zdravstvene ustanove.

Klub domaćin dužan je da osigura za cijelo vrijeme trajanja utakmica kadeta i juniora prisustvo dežurnog licenciranog ljekara sa odgovarajućom medicinskom opremom.

Klubovi su odgovorni za ponašanje svojih igrača, službenih osoba, članova, navijača i svake druge osobe koja obavlja dužnost na utakmici u ime kluba.

Za propuste u organizaciji utakmice klubovi će snositi takmičarske i disciplinske posljedice prema važećim propisima NS/FS BiH.

Shodno članu 9. stav 1. Pravilnika o registraciji, statusu i transferu NS/FS BiH, klubovi su dužni sve registrirane igrače osigurati od povreda, trajnog invaliditeta i smrti, ako su isti nastali prilikom treniranja, natjecanja, putovanja na natjecanje i putovanja na treninge. Protiv kluba koji ne poštuje ove odredbe povest će se disciplinski postupak prema odredbama Disciplinskog pravilnika NS/FS BiH, a klub može imati disciplinske i natjecateljske posljedice.

### **Član 16.**

U slučaju nastanka štete, odgovoran je klub domaćin, koji oslobađa NS/FS BiH svih zahtjeva za naknadu štete nastalu organizacijom utakmice.

## **IDENTITET IGRAČA**

### **Član 17.**

Na prvenstvenim utakmicama mogu nastupiti samo igrači čiji je identitet utvrđen putem sportske legitimacije izdate od nadležnog organa za registraciju, a u slučaju njenog nedostatka, identitet će se utvrditi na osnovu javne isprave: lična karta ili pasoš.

Ukoliko se identitet igrača utvrđuje na osnovu javne isprave, klub je obavezan na zahtjev Komiteta za takmičenje NS/FS BIH dostaviti u NS/FS BIH sportsku legitimaciju u roku od 24 sata. Identitet se u pravilu utvrđuje prije početka utakmice.

Za igrače koji su zakasnili na početak utakmice, odnosno na početak drugog dijela, utakmice a upisani su u zapisnik sa utakmice, identitet se utvrđuje za vrijeme odmora između dva dijela igre i neposredno po završetku utakmice.

### **Član 18.**

Pravo nastupa za ekipu juniora imaju svi pravilno registrirani igrači rođeni 01.01.1998. godine i mlađi, ali ne mlađi od 16 godina.

Pravo nastupa za ekipu kadeta imaju svi pravilno registrirani igrači rođeni 01.01.2000. godine i mlađi, ali ne mlađi od 14 godina.

Izuzetno, mogu nastupiti i igrači koji su godinu dana mlađi od naznačenih godina, ukoliko su na osnovu specijalnog ljekarskog pregleda proglašeni sposobnim za nastupe na tim utakmicama, pod uslovom da je to i uvedeno u sportskoj legitimaciji.

Na utakmicama mogu nastupiti samo oni igrači koji su proglašeni zdravstveno sposobnim, a što mora biti upisano u sportsku legitimaciju ili izuzetno moraju imati potvrdu o izvršenom ljekarskom pregledu.

Rok valjanosti ljekarskog pregleda za igrače starije od 17 godina je šest (6) mjeseci, a za igrače mlađe od 17 godina je četiri (4) mjeseca.

### **Član 19.**

Na prvenstvenim utakmicama nemaju pravo nastupa igrači koji se nalaze pod suspenzijom, kaznom zabrane igranja i automatskom kaznom zbog tri žuta kartona.

Automatsku kaznu zabrane igranja jedne prvenstvene utakmice, nastalu zbog tri žuta kartona, igrač izdržava na prvom sljedećoj prvenstvenoj, odnosno Kup utakmici.

Igrač koji je upisan u zapisnik utakmice, smatra se da nije nastupio ukoliko nije ušao u igru.

Na prvenstvenim i Kup utakmicama u zapisnik sa utakmice može biti upisano najviše sedam (7) zamjenskih igrača, od kojih u igru može ući najviše pet.

## **DELEGAT NA UTAKMICI**

### **Član 20.**

Delegata na utakmici u takmičenju POL BiH, završnice Omladinskog Kupa BiH i završnice Pionirskog prvenstva BiH, određuje Komitet za takmičenje NS/FS BiH, iz reda delegata BH Telecom Premijer lige BiH, Prve lige FS RS i Prve lige NS F BiH, te članova Odjela za takmičenje NS/FS BiH, u skladu sa Odlukom Izvršnog odbora NS/FS BiH.

Prava i obaveze delegata na utakmici na ovom nivou takmičenja, uređena su odredbama Pravilnika o nogomatnim/fudbalskim takmičenjima BiH i Propozicijama takmičenja BH Telecom Premijer lige BiH.

Delegat zastupa takmičarsko rukovodstvo i ima vrhovni nadzor na utakmici.

Delegat utakmice je obavezan odmah nakon odigrane utakmice unijeti sve podatke o utakmici (Izveštaj sa utakmice) u COMET sistem, a iste treba sravniti i zaključiti sudija utakmice sa svojom šifrom.

Delegat utakmice je obavezan u roku od 24 sati po odigranoj utakmici, sačiniti i zaključiti izvještaj, putem Comet-a, a spiskove igrača poslati faksom, poštom ili e-mailom.

Delegat utakmice je obavezan odmah po završetku utakmice istu zaključiti putem Fer-pleja, a u roku od 24 sata po odigranoj utakmici ili najkasnije prvi radni dan do 11:00 sati, u COMET-u zaključiti delegatsko izvješće.

Komitet za takmičenje donosi posebno Upustvo o vršenju dužnosti delegata.

Ukoliko na utakmici dođe do incidenata, prekida utakmice, isključenja igrača, ili na zahtjev Komiteta za takmičenje NS/FS BiH, delegat je obavezan dostaviti dopunski izvještaj.

#### **Član 21.**

Ako delegat utakmice utvrdi da bilo koje službeno lice kluba (predstavnik, trener, ljekar, fizioterapeut) nema licencu NS/FS BiH neće dozvoliti ulazak u ograđeni dio terena za igru.

#### **Član 22.**

Delegat je obavezan da 60 minuta prije početka utakmice održi radni sastanak sa predstavnicima klubova, sudijama utakmice, predstavnikom policije i predstavnikom hitne pomoći.

### **ZAPISNIK**

#### **Član 23.**

Delegat sastavlja zapisnik sa utakmice u prisustvu sudije utakmice i predstavnika klubova.

Zapisnik sa utakmice se popunjava elektronski, u COMET sistemu. Klubovi su dužni 60 minuta prije početka utakmice dostaviti ovjeren i potpisan spisak igrača i službenika svoje ekipe (kadeta i juniora) na propisanom obrascu.

Izuzetno ukoliko nema tehničkih mogućnosti da se zapisnik sačini putem Comet-a, potrebno je zapisnik uraditi ručno u četiri primjerka, koji potpisuju delegat, sudija i predstavnici klubova.

### **SUDIJE / SUCI**

#### **Član 24.**

Utakmice takmičenja Premijer omladinske lige BiH (juniora i kadeta), te završnice pionirskog prvenstva BiH mogu voditi sudije sa „A“ i „B“ liste Premijer lige BiH, Prve lige FS RS i Prve lige NS F BiH, Premijer ženske lige BiH, te po potrebi perspektivne sudije sa zvanjem „Savezne kategorije“ nižeg stepena takmičenja. Utakmice završnice Kupa BiH sude isključivo sudije sa Premijer lige BiH, čije određivanje vrši Komitet za sudije i suđenje NS/FS BiH.

Prava i obaveze sudija na ovom nivou takmičenja, uređena su odredbama Pravilnika o nogometnim/fudbalskim takmičenjima BiH, Pravilnikom o sudijama i suđenju NS/FS BiH i Propozicijama takmičenja BH Telecom Premijer lige BiH.

### **STADION I TEREN ZA IGRU**

#### **Član 25.**

Prvenstvene utakmice POL BiH i utakmice završnice Omladinskog Kupa BiH i Pionirskog prvenstva BiH, moraju se igrati na terenima od prirodne ili umjetne trave za koju je dat certifikat, koje su verifikovane od strane Komiteta za licenciranje NS /FS BiH.

Teren za igru, stadioni i uslovi za odigravanje utakmica moraju biti u skladu sa odredbama Pravilnika o nogometnim/fudbalskim takmičenjima BiH, Pravilnika o licenciranju klubova NS/FS BiH i Propozicijama takmičenja BH Telecom Premijer lige BiH i Pravilima nogometne/fudbalske igre (PNI).

Finalne utakmice završnice Kupa igraju se isključivo na terenima na kojima igraju seniori – prirodna trava.

### **ZABRANA NASTUPA ZBOG SUSPENZIJE**

#### **Član 26.**

Suspendovana ekipa ne može nastupiti na javnoj utakmici sve dok traje suspenzija.

## **ŽALBA**

### **Član 27.**

Žalbe na utakmice podnose se Komitetu za takmičenje NS/FS BiH, uz dokaz o uplaćenju taksi u skladu sa odlukom IO NS/FS BiH.

Najava žalbe dostavlja se u roku do 24 sata po odigranoj utakmici, a žalbe sa obrazloženjem i dokazom o uplaćenju taksi po svim osnovama moraju se dostaviti e-mailom, preporučenom poštom ili faxom u roku od 48 sati po odigranoj utakmici.

Ukoliko rok za žalbu ističe u nedjelju ili na državni praznik, rok se produžava za naredna 24 sata.

Odluke po žalbama donose se u roku do 8 (osam) dana od dana prijema žalbe.

Žalbe na odluke Komiteta za takmičenje NS/FS BiH podnose se Apelacionoj komisiji NS/FS BiH u roku od pet (5) dana od dana uručenja odluke, uz dokaz o uplaćenju taksi u skladu sa odlukom IO NS/FS BiH.

## **TAKSA NA ŽALBU**

### **Član 28.**

Iznos takse na žalbu je 50% od utvrđenog iznosa taksi za BH Telecom Premijer ligu BiH - seniori.

### **Član 29.**

Nenajavljene, neblagovremene i žalbe koje nisu uredno taksirane neće biti uzete u razmatranje.

Pri ocjeni blagovremenosti žalbe, uzima se u obzir datum na e-mailu, poštanskom pečatu preporučenog pisma ili telegrama, datum na faxu potvrđi o žalbi odaslanom faxom, ili datum na novčanoj uplatnici.

## **REGISTRACIJA UTAKMICA**

### **Član 30.**

Ako na utakmicu nije uložena žalba, a ne postoje razlozi za registraciju utakmice po službenoj dužnosti 3:0 (par forfe), Komitet za takmičenje NS/FS BiH utakmica će registrovati postignutim rezultatom.

Odigrane utakmice registruje predsjednik i dva potpredsjednika Komiteta za takmičenje NS/FS BiH, u pravilu najkasnije četrnaest (14) dana od dana odigravanja. Izuzetno, Komitet za takmičenje NS/FS BiH registraciju odigranih utakmica može izvršiti putem e-maila, telefona ili faksa.

Verifikaciju registracije odigranih utakmica vrši Komitet za takmičenje na prvoj narednoj sjednici.

U slučaju da je na neku utakmicu uložena žalba, rok za registraciju utakmice produžava se do donošenja odluke o žalbi, odnosno do pravosnažnosti te odluke. Jednom registrovana utakmica ne može biti poništena od strane Komiteta za takmičenje NS/FS BiH, ako je odluka postala pravosnažna ili je u drugom stepenu donijeta odluka koja je konačna, osim u postupku predviđenom Pravilnikom o nogometnim/fudbalskim takmičenjima NS/FS BiH.

## **DISCIPLINSKE SANKCIJE**

### **Član 31.**

O disciplinskim prekršajima koje naprave klubovi, sudije, treneri ili ostali nogometni/fudbalski dužnosnici u ovom takmičenju odlučuje Disciplinska komisija NS/FS BiH, na osnovu odredaba Disciplinskog pravilnika NS/FS BiH, a žalbe na odluku prvostepenog organa podnose se nadležnom drugostepenom organu NS/FS BiH.

Drugostepene odluke o disciplinskim prekršajima su konačne.

U interesu regularnosti takmičenja, nadležni organ može utvrditi i skraćeni rok rješavanja žalbe.

U svim disciplinskim slučajevima primjenjuje se Disciplinski pravilnik NS/FS BiH.

## **OBNAVLJANJE LIGE**

### **Član 32.**

Iz Premijer Omladinske lige na kraju takmičarske 2016/2017 sezone, ispadaju dvije ekipe čiji su seniori ispali iz BH Telecom Premijer lige BiH, a liga se popunjava ekipama klubova koji su stekli pravo takmičenja u BH Telecom Premijer ligi BiH za seniore u takmičarskoj godini 2017/2018.

## **UTVRĐIVANJE PLASMANA**

### **Član 33.**

Ekipa koja pobijedi na utakmici, osvaja tri boda, a u slučaju neriješenog rezultata svaka ekipa osvaja po jedan bod.

Plasman klubova na tabeli utvrđuje se prema odredbama člana 46. Pravilnika o nogometnim/fudbalskim takmičenjima BiH.

## **FINASIJSKE OBAVEZE U OKVIRU OVOG TAKMIČENJA**

### **Član 34.**

Shodno odluci Izvršnog odbora NS/FS BiH, klubovi su oslobođeni plaćanja kotizacije za takmičenje u sezoni 2016/2017.

### **Član 35.**

Službenim licima za utakmice Premijer omladinske lige BiH juniora i kadeta pripada taksa i putni troškovi u skladu sa odlukom IO NS/FS BiH.

Za prvenstvene utakmice POL BiH, završnicu Omladinskog Kupa BiH i završnicu Pionirskog prvenstva BiH isplata službenim licima (takse i putni troškovi) se vrši u skladu sa odlukom IO NS/FS BiH.

### **Član 36.**

Obračun i isplatu troškova službenim licima Premijer omladinske lige BiH će vršiti NS/FS BiH, iz finansijskih sredstava koje obezbjeđuje UEFA za razvoj omladinskog nogometa/fudbala u klubovima BH Telecom Premijer lige BiH.

## **NAGRADE**

### **Član 37.**

Prvaku Bosne i Hercegovine u kategoriji juniora i kadeta dodjeljuju se: pehar i 30 zlatnih medalja. Pobjedniku Omladinskog Kupa Bosne i Hercegovine dodjeljuju se: pobjednički pehar i 30 zlatnih medalja.

Drugoplasiranoj ekipi dodjeljuju se pehar i 30 srebrnih medalja.

## **ZAVRŠNICA OMLADINSKOG KUP-a BIH**

### **Član 38.**

U završnici Omladinskog Kupa Bosne i Hercegovine igraće pet ekipa iz NS F BiH i tri ekipe iz FS RS. U četvrtfinalu i polufinalu igraju se po dvije utakmice (po jedna na domaćem i gostujućem terenu). U finalu se igra jedna utakmica u organizaciji NS/FS BIH.

U slučaju identičnog rezultata, nakon revanš/uzvratne utakmice finala Kupa, odmah će se pristupiti izvođenju udaraca za dobijanje pobjednika sa tačke za izvođenje kaznenog udarca.

Takmičenjem završnog dijela Omladinskog Kupa BiH rukovodi Komitet za takmičenje NS/FS BiH, u saradnji sa Sektorom za takmičenja i upravljanje događajima NS/FS BiH.



Prvoplasiranoj i drugoplasiranoj ekipi u završnici Pionirskog prvenstva BiH dodijeljuju se pehari i po 30 zlatnih i 30 srebrnih medalja.

Organizaciju i sve druge troškove finalne utakmice Omladinskog Kupa BiH snosi NS/FS BiH.

## **ZAVRŠNICA PRVENSTVA BiH ZA PIONIRE**

### **Član 39.**

Takmičenje pionira organizuje se na nivou kantonalnih/županijskih/područnih saveza. U četvrtfinalu Pionirskog prvenstva BiH učestvuje 5 (pet) ekipa iz NS Federacije BiH i 3 (tri) ekipe iz FS RS, a igraju se po dvije utakmice (po jedna na domaćem i gostujućem terenu).

Pravo nastupa na utakmicama u kategoriji pionira u takmičarskoj godini 2016/2017. imaju igrači rođeni 01.01.2002. godine i mlađi, ali ne mlađi od 12 godina.

Utakmice završnice Pionirskog prvenstva BiH igraju se 2x35 minuta, a dozvoljeno je izvršiti najviše pet izmjena.

Četvrtfinalne utakmice se određuju žrijebom, a igraju se po dvije utakmice.

U polufinalu i finalu se igra po jedna utakmica, a organizator je NS/FS BiH, u Trening centru NS/FS BiH.

## **PRELAZNE I ZAVRŠNE ODREDBE**

### **Član 40.**

Za sve što nije predviđeno ovim Propozicijama, važe odredbe Pravilnika o nogometnim / fudbalskim takmičenjima BiH, Pravila nogometne/fudbalske igre, Propozicija takmičenja BH Telecom Premijer lige BiH i drugih propisa i odluka NS/FS BiH, kao i pravila Međunarodnog BOARD-a.

Za tumačenje ovih Propozicija nadležan je IO NS/FS BiH, putem Pravnog komiteta NS/FS BiH.

### **Član 41.**

Propozicije stupaju na snagu danom donošenja, a primjenjuju se za takmičarsku godinu 2016/2017.

**P R E D S J E D N I K**

**Elvedin Begić, s.r.**